



6. marts 2026

UPA2026/118

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Akilerartarnermut aammalu inuussutissarsiornermut malittarisassat atuuttut misissuiffigineqassasut, ilanngullugit B-skat pillugu malittarisassat kiisalu allaffissornikkut piumasagaatit allat, siunertaralugu inuussutissarsiornermut ineriartortitsinermit suliffissanik pilersitsinermullu Kalaallit Nunaanni pisariaqanngitsunik killilersuinerit aporfissallu suussusersineqarlutik atorunnaarsinneqarnissaat Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Tunngavilersuut:

Inuussutissarsiornermut ingerlatsivik pitsaasumik ingerlasoq Kalaallit Nunaanni aningaasaqarnikkut ineriartortitsinermit aammalu suliffissanik amerlanerusunik pilersitsinermut pingaaruteqarluinnarpoq. Taamaattumik pingaaruteqarpoq inatsisiliornerup aammalu allaffissornikkut malittarisassat pilersitsiniarnermut, inuussutissarsiornermut ingerlatsinermit aammalu aningaasaliinissamut pitsaasunik atugassaqaartitsinissaat.

Taamaattorli malittarisassat aammalu allaffissornikkut piumasagaatit ilaanni innuttaasut suliffeqarfiillu inuussutissarsiornermik ingerlatsinissamik imaluunniit suliffeqarfinnik nutaanik pilersitsinissamik kissaateqartut killilersorneqartutut misigisinnaasarput. Tamanna ilaatigut akilerartarnermut malittarisassanik, ilanngullugu B-skat pillugu aaqqissuussinermik, kiisalu allaffissornikkut piumasagaatinik allanik tunngaveqarsinnaavoq, suliffeqarfimmik pilersitsinissaq imaluunniit inuussutissarsiornermik ingerlatsinerup annertusarnissaa ajornarnerulersitsinnaasunik.

Kalaallit Nunaat suliffissanik amerlanerusunik pilersitsinissamik aammalu aningaasaliisunik kajumissaarinnissamik kissaateqarpat, pingaaruteqarpoq ingerlaavartumik nalilersorneqartarnissaa malittarisassat atuuttut inuussutissarsiornermik ineriartortitsinermit tapersersuinersut imaluunniit akornusersuinersut.

Taamaattumik siunnersuutip siunertaraa malittarisassat attuumassuteqartut ataatsimut misissorneqarnissaat, taamaalilluni inuussutissarsiornermik ingerlatsinermit killilersuinerit



aporfissallu suussusersineqarsinnaaqullugit. Misissuineq ilanngullugu qulaajassavaa allannguutissat imaluunniit suliniutit suut suliffeqarfimmik ingerlatsinissamut, isertitaqarfinnik arlariinnik pilersitsinissamut aammalu Kalaallit Nunaanni suliffissanik amerlanerusunik pilersitsinissamut oqinnerulersitsisinnaanersut.

Misissuineq aammattaaq siunnersuutiniq imaqartariaqarpoq, qanoq iliorluni Kalaallit Nunaanni pilersitsiniarnermut, aningaasaliinermit aammalu inuussutissarsiornermik ineriartortitsinermit pitsaanerusumik atugassaqartitsisoqarsinnaanersoq pillugu.

Pisortanut aningaasatigut allaffissornikkullu kingunerisassai:

Misissuinerup ingerlanneqarnera Naalakkersuisut tungaanit annikitsumik allaffissornikkut aningaasartuuteqartitsissasoq naatsorsuutigineqarpoq, pingaartumik misissueqqissaarnermut atatillugu.

Misissuinerup kingorna akileraartarnermut imaluunniit inuussutissarsiornermut malittarisassanik allannguissamut siunnersuuteqartoqassappat, tamanna pisortat isertitaannut aningaasatigut kingunerisinnaasaqarpoq. Kingunerisassat taakku inatsissatut siunnersuutit aalajangersimasut saqqummiunneqarnissaannut atatillugu erseqqinnerusumik nalilernerqartariaqassapput.

Naalakkersuisut aqutsinermit atugassatut immikkoortittariaqassaat annikitsuussapput, naatsorsuutigineqarporlu ukiumut AC-fuldmægtigiup ataatsip nalinga sinnernagu, tassa 500.000 kr.- inut naapertuuttumik.

Namminersortunut aningaasaatigut allaffissornikkullu kingunerisassai:

Misissuineq ingerlanneqartillugu siunnersuutip inuussutissarsiorturnut toqqaannartumik kingunerisassai naatsorsuutigineqanngillat. Siunissami allaffissornikkut aporfissat annikillineqarpata tamanna suliffeqarfinnut aammalu pilersitsiniartunut pitsaanerusunik atugassaqartitsisinnaavoq.

Innuttaasunut aningaasatigut allaffissornikkullu kingunerisassai:

Misissuineq ingerlanneqartillugu siunnersuutip innuttaasunut toqqaannartumik aningaasatigut imaluunniit allaffissornikkut kingunerisassai naatsorsuutigineqanngillat. Siunissami inuussutissarsiornermut pitsaanerusunik atugassaqartitsinerup suliffissanik amerlanerusunik aammalu aningaasaqarnikkut ingerlatsinerup annertusineranik pilersitsisinnaavoq.